

四庫全書

史部

欽定四庫全書

史部  
元和郡縣志卷二十八

詳校官編修<sub>臣</sub>曹城

檢討<sub>臣</sub>德生覆勘

總校官庶吉士<sub>臣</sub>倉聖脉

校對官中書<sub>臣</sub>范來宗

謄錄監生<sub>臣</sub>左熙世

謄錄監生<sub>臣</sub>任鑑

欽定四庫全書

元和郡縣志卷二十七

唐 李吉甫 撰

江南道

越州

會稽都督府

開元戶十萬七千六百四十五  
元和戶二萬六千八百八十五  
鄉二百一十  
鄉一百四十五

今為浙東觀察使理所  
管越州婺州衢州處州溫  
州台州明州  
管縣三十

七  
都管戶十萬四千三百六十七

禹貢揚州之域春秋時為越周禮吳越星紀之分夏少

康封少子無餘以奉禹祀號曰於越越國之稱始於茲

矣後代句踐稱王與吳王闔閭戰敗之檣

音醉

李故城在今嘉興

縣南三十七里

夫差立句踐復伐吳滅之并其地遂渡淮遷都

琅邪朝貢周周錫命為伯至六代王無彊為楚所滅秦

以其地并吳立為會稽郡後漢順帝時陽羨令周喜上

書以吳越二國周旋一萬一千里以浙江山川險絕求

得分置遂分浙江以西為吳郡東為會稽郡自晉至陳

又於此置東揚州隋平陳改東揚州為吳州大業元年  
改為越州武德四年討平李子通置越州總管六年隋  
輔公祐七年平定公祐改總管為都督

州境

東西六百二十八里  
南北三百六十里

八到

西北至上都三千五百三十里  
西北至東都二千六百七十里

東至明州二百七十五里  
東南至台州四百七十五里

西南至婺州三百九十里  
西北至杭州一百四十里

貢賦

開元貢 甘橘 甘蔗 葛根 石蜜 交梭  
賦 紵布

自貞元以後凡貢之外別進異文吳綾及花鼓歇  
單絲吳紗吳朱紗等織麗之物凡數十品案前  
此惟同州澤州懷州襄州唐州隨州房州利州鳳  
州常州蘇州杭州湖州睦州兼戴開元元和貢又  
惟潤州與此越州論及貞元以後進奉其他府州  
僅戴開元貢稽之杜佑通典所列開元天寶時諸  
郡常貢名目亦不盡同當是傳寫既多缺佚復  
有舛訛今參校各本不異悉仍其舊附識於此

管縣七

會稽 山陰 諸暨 餘姚 蕭山 上虞

剡

會稽縣 望郭下

山陰越之前故靈文國也秦立以為會稽山陰漢初為都尉隋平陳改山陰為會稽縣皇朝因之吳越春秋云禹巡行天下會計修國之道因以會計名山仍為地號宋略云會稽山陰編戶三萬號為天下繁劇

重山大夫種葬處

會稽山在州東南二十里

蘭亭山在州西南一十一里

大海在州東四十里

鏡湖後漢永和五年太守馮臻創立在會稽山陰兩縣界築塘蓄水高丈餘田又高海丈餘若水少則洩湖灌田如水多則閉湖洩田中水入海所以無凶年隄塘周迴三百一十里溉田九千頃

山陰縣

望

山陰縣秦舊地也隋改為會稽垂拱二年又割會稽西界別置山陰大歷二年刺史薛兼訓奏省山陰併會稽七年刺史劉少游又奏置今復併入會稽

案傳寫各本以此五十八



字錯置前以會稽名山仍為地號之下而別標同  
會稽三字於此今就丈義參合各縣叙例後正

諸暨縣

望東北至州一百四十四里

秦舊縣也界有暨浦諸山因以為名越王允常所居

烏帶山在縣北五十里出紫石英

餘姚縣

紫西北至州一百四十五里

本漢舊縣舜後支庶所封之地舜姚姓故曰餘姚隋平

陳廢武德四年復立仍置姚州七年廢州

四明山在縣西一百五十里

大海在縣北三十里

蕭山縣

緊東北至州一百里

本曰餘暨吳王弟夫槩邑吳大帝改曰蕭山以縣西一里蕭山為名

浙江在縣西二十五里

浦陽江在縣南一十五里

上虞縣

上西至州九十六里

故城西枕上虞江

案上虞本漢舊縣此未詳

隋平陳廢貞元元年刺

史王密復奏置

上虞江在今縣西二十八里

剡縣 望西北至州一百八十五里

漢舊縣故城在今縣理西南一十二里吳智高為令移理今所隋末陷於李子通武德中以縣為嵎州六年廢州縣依舊

天姥山在縣南八里

剡溪山縣西南北流入上虞縣界為上虞江

婺州

東陽上

開元戶九萬九千四百九  
元和戶四萬八千三十六

鄉一百九十八  
鄉二百

禹貢揚州之域春秋時為越之西界秦屬會稽郡今之  
州界分得會稽郡之烏傷太末二縣之地本會稽西部  
嘗置都尉孫皓始分會稽置東陽郡陳武帝置縉州隋  
開皇九年平陳置婺州蓋取其地於天文為婺女之分  
野隋氏喪亂陷於寇境武德四年討平李子通置婺州  
六年輔公祐叛州又陷沒七年平定公祐仍置婺州

州境

東西北三百三十三里  
南西北四百五十六里

八到

西北至上都三千九百九十五里  
西北至東都三千三十五里

東南至處州二百六十里

西至衢州一百九十里

正北微東至越州三百九十里

正北微西至睦州一百六十里水路一百八十里

貢賦

開元貢  
賦  
藤紗  
紵布

元和貢  
織纈  
白藤細紙

管縣七

金華 義烏 永康 東陽 蘭溪 武義

浦陽

金華縣

望郭下

本漢烏傷縣地獻帝初平二年分烏傷置長山縣屬會稽郡隋平陳改為吳寧縣十二年又改為東陽縣十八年又改為金華縣其長山一名金華故取名焉

東陽江有二源一南自永康縣界流入一東自義烏縣界流入至縣界南合為一謂之東陽江

金華山在縣北二十里赤松子得道處出龍鬚草

義烏縣

緊西南至州一百五十一里

本秦烏傷縣也孝子顏烏將葬羣烏銜土助之烏口皆傷時以為純孝所感乃於其處立縣曰烏傷武德四年於縣置綢州縣屬焉又改烏傷為義烏

永康縣

望西北至州一百九里

本漢烏傷縣地吳大帝分烏傷之南界置隋廢武德四年於縣置麗州八年廢州縣屬婺州

東陽縣

望西至州一百五十里

本漢烏傷縣地垂拱二年分義烏縣置取舊東陽縣名也

蘭溪縣

緊東南至州五十里

咸通五年割金華縣西界置

蘭溪在縣南七里東北流入東陽江

武義縣

上北至州九十里

天授二年分永康西界以為武義縣

浦陽縣

上西南至州一百二里



天寶十三年分義烏縣北界置

浦陽江在縣西北四十里出雙溪山嶺東入越州諸暨

縣

衢州

信安上

開元戶六萬二千二百八十八鄉一百二十四  
元和戶一萬七千四百二十六鄉一百七

本舊婺州信安縣也武德四年平李子通於信安縣置

衢州以州有三衢山因取為名六年陷輔公祐廢州垂

拱二年復置

州境

東西六百一十里  
南北二百一十五里

八到

西北至上都四千九十五里  
西北至東都三千一百三十五里

東至婺州一百九十里

東南至處州四百五十里

東南至建州七百里

西至信州二百五十里

貢賦

開元貢  
賦  
縣紙  
紵布

元和貢  
縣紙  
黃連  
葛粉  
簞  
扇

龍  
鎮  
席

管縣四

信安  
常山  
龍丘  
須江

信安縣

望郭下

本春秋姑蔑之地漢太末縣也獻帝初平三年分太末立新安縣屬會稽郡晉太康元年以弘農有新安故改名信安皇朝置州縣屬焉

常山縣

上東至州八十里

本太末縣地隋初置定陽縣隋末廢咸亨三年於今縣東四十里置常山縣因縣南有常山為名廣德二年本道使薛兼訓奏移置於舊縣西四十里即今縣是

龍丘縣

緊西至州七十二里

本春秋姑蔑之地越西部也杜注云今東陽太末縣越絕書謂之姑嫪州吳大帝赤烏三年改太末為龍丘因縣東龍丘山為名隋末廢貞觀八年又置

須江縣

上北至州九十五里

武德四年置衢州分信安縣南境置須江縣八年竝廢永昌元年秋復置以縣南有須江溪因以為名

盈川縣本漢太末縣地如意元年分龍丘縣置

案唐書地理志

元和七年  
省入信安

穀水江在縣東南一里

處州 縉雲上

開元戶三萬三千二百七十八 鄉七十六  
元和戶一萬九千七百二十六 鄉三十六

禹貢揚州之域春秋為越國秦滅楚置會稽郡後越王  
無諸七代孫閔君操佐漢有功立為東越王都東甌今  
温州永嘉縣是也後以甌地為回浦縣屬會稽後漢改  
回浦為章安晉立為永嘉郡梁陳因之隋開皇九年平

陳改永嘉為處州十二年又改為括倉大業三年復改  
為永嘉郡武德四年討平李子通復立括州仍置總管  
府七年改為都督府貞觀元年廢府天寶元年為縉雲  
郡乾元元年復為括州大歷十四年以與德宗廟諱同  
音改處州貞元六年刺史齊抗以舊州湫隘屢有水災  
北移四里就高原上

州境

案州境里  
數傳寫缺

八到

西北至上都四千二百五十五里  
西北至東都三千二百九十五里

西北至婺州二百六十里  
西北至衢州四百五十里

東北至台州四百九十里  
東南水路至溫州二百七十里

東南至建州水路九百里陸路四百九十里

貢賦

開元貢

蠟 蜜

絲

元和貢

紵布

絲絹

絲紬

小綾

麻布

樹皮布

管縣六

麗水

松陽

縉雲

遂昌

青田

龍泉

麗水縣

上郭下

本後漢松陽縣地隋平陳乃分松陽縣之東鄉立括蒼縣取括蒼山為名屬處州後因之不改大歷十四年改為麗水麗水本名惡溪以其湍流阻險九十里間五十六瀨名為大惡隋開皇中改為麗水故皇朝因之以為縣名

松陽縣

上東至州一百九十二里

本漢回浦縣之地屬會稽後漢分立此縣

案後漢書郡國志但云以

章安縣東甌鄉為縣此云分立松陽常別有所據舊唐書地理志亦云後漢分章安之南鄉置松陽縣於此相



合有大松樹大八十圍因取為名隋開皇元年廢十二年復置皇朝因之

縉雲縣 上西南至州八十五里

萬歲登封元年分麗水縣東北界婺州永康縣南界置因山為名

縉雲山一名仙都一曰縉雲黃帝鍊丹於此

遂昌縣 上東至州三百四十里

吳赤烏二年分太末縣置平昌縣晉太康元年改為遂

昌武德八年廢景雲二年刺史孔琮復奏置

青田縣

中西北至州一百五十里

本麗水縣之鄉名也景雲二年刺史孔琮奏於此分置

青田縣

青田溪在縣西南一十八里

龍泉縣

中東至州三百五十里

乾元二年越州刺史獨孤峻奏割遂昌松陽二縣置

龍泉洞在縣南二里

溫州 永嘉上

開元戶三萬七千五百五十四  
元和戶八千四百八十四

鄉七十八  
鄉一十六

本漢會稽東部之地初閩君搖有功於漢封為東甌王  
晉大寧中於此置永嘉郡隋廢郡地入處州武德五年  
杜伏威歸化於縣理置東嘉州尋廢六年輔公祐為亂  
於丹陽永嘉安固等百姓於華蓋山固守不陷凶黨高  
宗上元元年於永嘉縣置溫州

州境 東西二百四里  
南北七百二十里

八到

西北至上都四千五百二十五里  
西北至東都三千五百六十五里

西北至處州二百七十里  
東至大海八十里

正北微西至台州五百里  
西南至福州水陸路相兼一千八百里

貢賦

開元貢  
賦  
紵布  
鮫魚皮

元和貢  
鮫魚皮三十張

管縣四

永嘉  
安固  
橫陽  
樂成

永嘉縣

上郭下

即漢回浦縣之東甌鄉晉立為縣上元二年於此置溫州縣移在州東百八十步

永嘉江一名永寧江在州東三里

華蓋山在州東一里

安固縣

上北至州七十七里

本漢回浦縣地後漢改回浦為章安吳分章安於此立羅陽縣少帝改曰安陽晉太康元年更名安固前上元二年自處州割入溫州

安固江在縣南一里

橫陽縣

上北至州一百五里

本晉太康元年分安固南橫嶼屯置隋平陳廢入安固縣大足元年又分安固縣再置

橫陽山在縣南二百七十里東臨大海

橫陽江在縣南一百里

樂成縣

上北至州一百二十四里

本漢回浦縣地東晉孝武帝分永寧縣置隋廢載初元

年復置

大海在縣東一十一里

台州 臨海上

開元戶五萬 鄉一百一十五

案元和戶鄉數傳寫缺

禹貢揚州之域春秋時為越地秦并天下置閩中郡漢立南部都尉本秦之回浦鄉分立為縣揚雄解嘲云東南一尉西北一候是也後漢改回浦為章安縣吳大帝時分章安永寧置臨海郡隋平陳廢郡為臨海縣武德

四年討平李子通於臨海縣置海州五年改海州為台州蓋因天台山為名六年輔公祏叛州從陷沒七年平

定公祏仍置台州

州境

東西三百九十三里  
南北四百三十五里

八到

西北至上都四千五百里  
西北至東都三千一百四十五里

東至大海一百八十里  
正南微東至溫州五百里

東北至越州四百七十五里  
正西微南至處州四百九十里

貢賦

開元貢  
賦  
乾薑三百斤  
紵布



元和貢 甲香三十斤 鮫魚皮一百張

管縣五

臨海 唐興 黃巖 樂安 寧海

臨海縣

緊郭下

本漢回浦縣地後漢更名章安吳分章安置臨海縣屬  
會稽武德五年改置台州縣屬焉

臨海江有二水合成一水一自始風溪一自樂安溪至  
州城西北一十三里合

唐興縣

上東南至州一百一十里

三國時吳分章安置南始平縣晉武帝以雍州有始平改為始豐肅宗上元二年改為唐興

天台山在縣北一十里

赤城山在縣北六里實為東南之名山

黃巖縣

上北至州一百五里

前上元二年割臨海南界置

黃巖山在縣西南二百三十里

大海在縣東七十里

樂安縣

上東至州一百五里

東晉穆帝永和三年分始平南鄉置樂安縣屬臨海郡  
歷代因之隋開皇九年廢上元元年復置於孟溪之側  
今縣是也

樂安溪源出縣西馮溪山流經縣南又東入臨海縣界  
寧海縣

上西南至州二百五十里

晉穆帝永和三年分會稽之鄞縣置寧海縣屬臨海郡

隋開皇九年廢郡併入章安縣永昌元年於廢縣東二十里又置載初元年移就縣東一十里

大海在縣東六里

明州 餘姚上

元和戶四千八十三

崇開元戶鄉數與元和鄉數並傳寫缺

本會稽之鄞縣及句章縣地也春秋越王句踐平吳徙夫差於甬東韋昭云即句章東浹口外洲是也武德四年於縣立鄞州八年廢開元二十六年採訪使齊澣奏

分越州之鄞縣置明州以境內四明山為名句章故城

在今州西一里

州境

案州境里數及開元貢賦並傳寫缺

八到

西北至上都三千八百五里  
西北至東都二千九百四十五里

東北至大海七十里

西至越州二百七十五里

東南至台州臨海縣一百六十里至州二百五十

里

貢賦

元和貢

海肘子

橘子

紅蝦米

鱸子

紅蝦鮓

烏蜆骨

管縣四

鄧縣 奉化 慈溪 象山

鄧縣

中郭下

本漢舊縣也屬會稽郡隋平陳省入句章武德八年再置仍移理句章城後屬明州

大海在縣東七十里

翁洲入海二百里即春秋所謂甬東地也越滅吳請吳王居甬東吳王曰孤老矣不能事君王乃縊其洲周環五百里有良田湖水多麋鹿

奉化縣

上北至州六十里

本漢之鄆地開元二十六年採訪使齊澣奏置

赤覓山在今縣東一十里

慈溪縣

上東南至州七十里

本漢鄆縣地開元二十六年齊澣奏置

慈溪在縣南二十二里

大海在縣北六十里

象山縣

中西北至州水陸相兼一百六十里

本漢鄆縣地神龍元年監察御史崔皎奏於寧海縣東  
界海曲中象山東麓彭姚村置縣東至大海二十里南  
至大海三十五里東北至大海四十里正北至大海一  
十五里惟西南有陸路接台州寧海

元和郡縣志卷二十七



欽定四庫全書

元和郡縣志卷二十八

唐 李吉甫 撰

江南道 三

鄂州 江夏緊

開元戶一萬九千一百九十  
元和戶三萬八千六百一十八  
鄉三十三  
鄉三十七

今為鄂岳觀察使理所  
管鄂州沔州安州黃州蘄  
州岳州管縣二十五

都管戶七萬二千二百四十七

禹貢荊州之域春秋時謂之夏汭漢為沙羨之東境自後漢末謂之夏口亦名魯口吳置督將於此名為魯口屯以其對魯山岸為名也三國爭衡為吳之要害吳常以重兵鎮之魏明帝問司馬懿曰二虜宜討何者為先對曰吳以中國不習水戰故敢散居東關凡攻敵必扼其喉而樁其心夏口東關敵之心喉若以陸軍向皖引權東下為水軍向夏口乘其虛而擊之此神兵從天而降矣晉庾翼為荊州曾理於此義熙初劉毅表以為夏

口三州之中地居形要控接湘州邊帶漢沔請荊州刺史劉道規鎮夏口至六年自臨嶂徙理夏口即今州理是也宋孝武帝以方鎮太重分荊湘江三州之八郡為郢州以分上流之勢隋平陳改郢州為鄂州州城本夏口城吳黃武二年城江夏以安屯戍地也城西臨大江西南角因磯為樓名黃鶴樓三國時黃祖為太守吳遣凌統攻而擒之彌衡遇害亦此地也東南角樓名焦度樓宋沈攸之自荊州稱兵至此時焦度領兵在此城守

東南角攸之攻之不克遂退走因名焦度樓

州境

東西四百七十四里  
南北三百八十八里

八到

西北至上都二千二百六十里  
東北至東都一千四百里

東至江州六百里

西至河州隔江七里

西南至岳州五百一十里

西北至安州二百九十里

正北微東至黃州二百里

貢賦

開元貢賦

銀布  
碌

管縣五

江夏 永興 武昌 唐年 蒲圻

江夏縣 望郭下

本漢沙羨縣地屬江夏郡東晉以汝南流人僑立汝南郡後改為汝南縣隋開皇九年改為江夏縣屬鄂州

黃鶴山在縣東九里

江水西南自蒲圻縣界流入又北對崢嶸洲劉毅破桓玄於此又北流經黃軍浦相傳吳將黃蓋屯軍處

曹公城在縣東北二里梁武起義遣將曹景宗所築

頭陀寺在縣東南二里

鸚鵡洲在縣西南二里

永興縣緊西北至州四百里

本漢郢縣地吳大帝分立新陽縣隋開皇九年改為富

川十八年改為永興縣

石鼓山在縣西六十里上有三石鼓鼓鳴天即雨

大江水在縣西北四十五里

下雉故縣在縣東南一百四十里漢伍被謂淮南王安

曰守下雉之城絕豫章之口是也

陳永興故城在縣東五十里東臨江水俗云伍子胥所築

武昌縣

緊西至州一百七十里

舊名鄂本楚熊渠封中子紅於此稱王至今武昌人事鄂王神是也離騷云乘鄂渚而反顧漢以為縣屬江夏郡武帝以封姊號鄂邑長公主建安二十五年吳大帝以下雉尋陽新城柴桑沙羨武昌六縣為武昌郡黃武

初自建業徙都廢黃龍九年於此即尊位還都建業皇  
太子登留守武昌以陸遜輔之嘉禾元年太子還建業  
立皇子奮為齊王居武昌諸葛恪不欲諸王處瀕江兵  
馬之地徙居豫章甘露元年歸命侯又都之揚土百姓  
汴流供給以為患苦陸抗上疏曰武昌土地實危險而  
墉确非王都安國養人之處且童謠言寧飲建業水不  
食武昌魚寧還建業死不止武昌居於是還都建業改  
為江夏縣後為武昌



樊山在縣西三里謝元暉詩曰釣臺臨講閱樊山開廣宴謂此也

西塞山在縣東八十五里疎峭臨江

孫權故都城在縣東一里餘本漢將灌嬰所築晉陶侃桓溫為刺史並理其地

唐年縣上西北至州六百三里

本漢沙羨縣地天寶二年分置唐年縣

葛仙山在縣北六十里

壺頭山在縣東北六十里

下雋故城在縣西南一百六里因雋水為名

蒲圻縣

上東北至州四百一十里

本漢沙羨縣地晉武帝改為沙陽今縣缺一里沙陽故縣城是也吳大帝分立蒲圻縣因蒲圻湖為名本屬長沙郡隋割屬鄂州

赤壁山在縣西一百二十里北臨大江其北岸即烏林與赤壁相對即周瑜用黃蓋策焚曹公舟船敗走處故

諸葛亮論曹公危於烏林是也

雋水源出縣東南

大嶠水西北流入江

蒲圻湖在縣南七十五里

呂蒙城在縣西南八十里孫權以蒙為橫野將軍為周瑜破曹公定荊州於此鎮守

沔州 漢陽上

開元戶五千二百八十六  
元和戶二千二百六十二

鄉十二  
鄉十二

本漢安陸縣地晉於今州西臨漳山下置沱陽縣江夏郡自上昶城移理焉後郡又移理夏口沱陽縣屬郡下不改入陳廢隋開皇九年置戍十七年廢戍改置漢津縣屬沱陽郡大業二年改為漢陽縣武德四年分沱陽郡於漢陽縣置沱州及縣竝自臨漳山下改移於今理

州境

東西二百五十二里  
南北二百四十六里

八到

西北至上都二千二百五十里  
東北至東都一千三百九十三里

東渡江至鄂州七里

東北至黃州二百二十里

西至復州竟陵縣三百四十里  
西取桐家路至復州四百六十里

西北至安州二百八十里  
西北至隨州四百三十五里

## 貢賦

開元貢 白紵布一端  
元和貢 麻背布一端

案此沔州與蘄洪饒虔吉江袁信撫宣歙潭衡郴  
永連道邵漳汀浯思費南珍漆播辰錦叙溪施樊  
等州之賦竝傳寫遺缺其所貢之布葛或言端或  
言足據杜佑通典載開元二十五年令江南諸州  
租布帛皆闊尺八寸長四丈為足布五丈為端則  
端與足本自不同而是志於各州未悉載當亦由  
傳寫失之

## 管縣二

漢陽 漢川

漢陽縣 中郭下

縣本未已具州叙

魯山一名大別山在縣東北一百步其山前枕蜀江北  
帶漢水山上有吳將魯肅神祠

臨嶂山在縣西六十里

大江水南自復州沔陽縣界流入去縣東二十步東北  
流入黃州界

漢水一名沔水西自漢川縣界流入漢陽縣因此水為名

郤月故城在縣北三里劉表將黃祖所守處

漢川縣 中東至州一百五十里

本漢陽縣地武德四年分置漢川縣因漢水為名也

內方山在縣南九十里

小別山在縣東南五十里春秋吳伐楚令尹子常濟漢而陣自小別至於大別即此也

漢川水在縣南二里西北自鄂州界流入

赤壁草市在縣西八十里古今地書多言此是曹公敗處今按三國志劉表卒其子琮代立在襄陽劉備屯樊琮降曹公備隨南走曹公以江陵有軍實恐備先據得之自當陽倍道追備一日夜行三百里遂克江陵又自江陵追備至巴丘遂至赤壁孫權遣周瑜程普各領兵萬人與劉備來敵曹公過於赤壁因風縱火曹公大敗遂取華容道步歸退保南郡瑜等復追之曹公留曹仁



守江陵自徐北歸據此而言則赤壁不在汭川也何則  
曹公既從江陵水軍至巴丘赤壁又在巴丘之下軍敗  
引還南郡周瑜水軍退並是大江之中與汭川殊為乖  
繆蓋是側近居人見崖岸赤色因呼為赤壁非曹公敗  
處也

安州 安陸中都督府

開元戶二萬二千二百二十二  
元和戶九千八百一十九

鄉三十五  
鄉三十五

春秋時鄖國後為楚所滅漢為安陸縣高帝六年分南

郡置江夏郡於此領縣二十四後漢移理沙羨

案後漢書郡國

志云凡縣名先書者郡所治也其志江夏郡先書西陵最  
後乃書沙羨似無移治之事蓋亦劉昭所謂遺缺衆書  
所載之一證也此元和志不專據范志故下文有前史所載云云

曹魏齊王芳時王基

為荊州自城上昶徙江夏郡理之以逼夏口在今州西

北五十三里上昶故城是也江夏郡自後漢末當吳魏

二國之境永嘉南遷後又當苻秦石趙與東晉犬牙為

界自後魏周隋與宋齊梁陳交爭之地故江夏前史所

載或移於沙羨或移於上昶或移理魯山城南北二朝

兩置江夏郡吳理武昌曹魏與晉俱理安陸故漢所理

江夏郡前書多言在安陸其雲夢縣東南四里涓水之

北有江夏古城周所理據山川言之此城南近夏水餘

趾寬大則前漢江夏郡所理也宋武帝分江夏置安陸

郡後魏大統十六年改為安州

案此所叙未全據隋書地理志云西魏置安州

總管府開皇十四年府廢又云舊置安陸郡開皇初郡廢大業初復置舊唐書地理志云宋分江夏立安陸郡

武德四年改為安州治於安陸

州境

東西二百一十九里南北三百二十五里

八到

西北至上都一千九百七十里  
東北至東都一千一百六十里

東至黃州三百一十里

東南至沔州二百八十里

東南至鄂州二百九十里

西南至復州三百二十里

西北至隨州一百五十五里

貢賦

開元貢賦

紵布一十八疋  
縣紵

管縣六

安陸 應山 雲夢 孝昌 吉陽 應城

安陸縣

上郭下

本漢舊縣屬江夏郡隋改屬安州

案隋書地理志安陸縣是安陸郡治此云

改屬未協州治各縣書例與舊唐書安陸縣志文亦不符

其城三重西枕湏水

陪尾山一名橫山在縣北六十里

案橫山漢書地理志作橫尾山禹貢

云熊耳外方桐柏至於陪尾即此也

湏水故清發水也西北自隨州流入注於沔謂之鄖口

春秋吳敗楚於柏舉從之及於清發是也

雲夢澤在縣南五十里史記司馬相如傳曰楚有七澤

其小者名雲夢方九百里左傳云邲子之女棄子於夢

中無雲字楚子濟江入雲中復無夢字以此推之則雲  
夢二澤本自別矣而禹貢及爾雅皆曰雲夢者蓋雙舉  
二澤而言之故後代以來通名一事左傳曰畋于江南  
之雲夢是也

應山縣

中南至州一百八里

本漢隨縣地梁大同以隨州北界應濃山戍置應州又  
分隨縣置永陽縣隋開皇十八年改永陽為應山縣  
石龍山在縣東北二十五里有石盤回屈曲若龍形

澧山關因古澧山縣為名武德八年縣廢即齊志所謂  
武陽關也在州東北二百四十里在縣東北一百三十  
里北至申州一百五十里

百雁關按圖經云昔有雁息其上故以為名在州東北  
二百里在縣北九十里北至申州九十里東至澧山關  
一百里

平靖關因古平靖縣為名後魏大統十七年置隋大業  
二年廢齊志云義陽有三關此則其一在州北一百七

十里在縣北六十五里北至申州九十里東至百雁關一百六十里

雲夢縣

中北至州七十里

本漢安陸縣地後魏大統末於雲夢古城置雲夢縣雲夢澤在縣西七里

孝昌縣

中西至州八十里

本漢安陸縣地宋於此置孝昌縣屬江夏郡隋改安州也



吉陽縣

中西至州一百三里

本漢安陸縣地梁於此置平陽縣其故城今理是也西魏改為京池縣隋大業二年改為吉陽因縣北吉陽山為名

應城縣

中東北至州八十里

本漢安陸縣地宋於此置應城縣

故浮城縣在縣西北三十五里即古蒲騷城也左傳莫敖狃于蒲騷之役鄖人軍于蒲騷是也後魏於此置浮

城縣隋廢

孔山故城在縣東北一百一十里

平靖故城在縣西四十里

吉陽故城在縣北五十里

黃州 齊安下

開元戶一萬三千七十三  
元和戶五千五百四

鄉二十八  
鄉一十八

本春秋時邾國之地後又為黃國之境戰國時屬楚秦  
屬南郡二漢為江夏郡西陵縣地魏為重鎮文帝黃初

中吳先揚言欲畋於江北豫州刺史滿寵度其必襲西陽遂先為之備權間之尋亦退還後吳克邾城使陸遜以三萬入城而守之至晉為西陽國封子弟為王蕭齊於此置齊安郡隋開皇三年罷郡置黃州因古黃國為名也

州境

東西二百一十里  
南北三百三十七里

八到

西北至工都二千二百八十里  
東北至東都一千四百七十里

東南至蘄州二百三十里  
南至大江一百步

西南至鄂州二百三十里  
西至安州三百一十里  
北至光州三百六十里

貢賦

開元貢賦

紵黃布十疋  
絹布絲麻

管縣三

黃岡 黃陂 麻城

黃岡縣 上郭下

本漢西陵縣地故城在今縣西二里蕭齊於此置齊安縣隋開皇十八年改為黃岡因縣東黃岡為名

大江水西自黃陂縣界流入經州南一百一十八里東入蘄州界

故邾城在縣東南一百二十里古邾國也後為楚所滅漢以為縣

西陽故城在縣東南一百三十里漢縣也屬江夏郡

大活故城在縣北二百三十五里隋於此置關鎮

黃陂縣 中東北至州一百二十里

本漢西陵縣地三國時劉表為荊州刺史以此地當江

漢之口懼吳侵軼建安中使黃祖於此築城鎮遏因名黃城鎮周大象元年改鎮為南司州并置黃陂縣隋初改為鎮後復為縣

白沙關西至大關六十里在州西二百四十里北至光州界二十五里

大活關東北至光州二百八里西至安州澧山關一百里在縣北二百里

大江水在縣南一百一十九里西南自江夏縣界流入

又東入黃岡縣界

武湖在縣南四十九里黃祖閱武習戰之所後宋謝晦  
舉兵叛為檀道濟所破敗走武湖戍生執之即此地也  
龍驤水在縣南七十二里相傳晉龍驤將軍王濬率舟  
師伐吳屯軍於此

石陽故城在縣西二十三里吳閭魏文帝崩征江夏圍  
石陽不克而還即此也

安昌故城在縣西南七十里高齊築以捍陳寇

麻城縣 中南至州一百一十里

本漢西陵縣地梁於此置安信縣隋開皇十八年改為  
麻城縣

龜頭山在縣東南八十里舉水之所出也春秋吳楚戰  
於柏舉即此地也

穆陵關西至白沙關八十里在縣西北一百里在州北  
二百里至光州一百四十九里

陰山關西至穆陵關一百里在縣東北一百一十里在



州東北二百一十里北至光州殷城縣二百里

蘄州 蘄春上

開元戶二萬六千八百九  
元和戶一萬六千四百六十二

鄉五十一  
鄉五十一

禹貢揚州之域春秋戰國並屬九江郡在漢為蘄春縣  
地屬江夏郡三國時屬魏魏使廬江謝奇為蘄春典農  
屯皖呂蒙襲擊破之後於此復置蘄春郡晉孝武帝改  
曰蘄陽以鄭太后諱故也高齊於此立齊昌郡後陷於  
陳改為江州周平淮南改為蘄州

州境

東北三百三十九里  
西北五百五十五里

八到

西北至上都二千五百一十里  
東北至東都一千七百里

西北至黃州二百三十里

東北至江州二百五十里

東北至舒州三百七十里

東北至壽州踰大山九百七十里

貢賦

開元貢 白紵細布  
元和貢 白紵布一十五疋

管縣四

蕲春 黃梅 蕲水 廣濟

蕲春縣

上郭下

本漢舊縣屬江夏郡因蘄水以為名也晉改為蘄陽隋開皇十八年復改蘄春縣

蘄水西南經縣三里源出東北大浮山一名蘄山

翻車故城在縣東南八十二里九江王黥布背項籍歸漢因築此城城近翻車水因以為名

黃梅縣 上西至州一百四十里

本漢蘄春縣地隋開皇九年置新蔡縣屬蘄州仁壽元年改為黃梅縣因縣北黃梅山為名縣城晉驃騎將軍

郭默所築

大江水在縣南一百里

太子湫在江之岸梁武帝初下建業留丁貴嬪于此生太子因以為名

九江故城在縣西南七十里漢九江王黥布所築

蕲水縣 上東南至州七十二里

本漢蕲春縣地宋文帝於此置浠水縣北齊改為蘭溪鎮武德四年改為縣天寶六年以名重改為蕲水縣也

廣濟縣 中西至州五十里

本漢蘄春縣地武德四年以此地衝要置永寧縣天寶元年以名重改為廣濟縣

江水在縣南一百二十里

積布山在縣南一百里南臨大江壘石壁立形如積布故以為名俗謂之積布磯

岳州 巴陵下

開元戶九千一百六十五  
元和戶一千五百三十五

鄉二十一  
案鄉數傳寫缺

本巴丘地古三苗國也史記三苗之國左洞庭右彭蠡  
春秋及戰國時屬楚秦屬長沙郡吳於此置巴陵縣宋  
文帝又立為巴陵郡梁元帝改為巴州隋開皇九年改  
為岳州大業三年為羅州武德六年復為岳州

州境

東西三百九十一里  
南北四百五十里

八到

西北至上都二千二百二十五里  
東北至東都一千八百六十五里

東北至鄂州五百五十里

南至潭州五百五十里

西至澧州四百四十里

西北至江陵府五百七十里

北至復州沔陽縣五百五十里

貢賦

開元貢賦

細紵布

縑

元和貢

白紵練布七疋

管縣五

巴陵 華容 湘陰 沅江 昌江

巴陵縣

上郭下

本漢下雋縣之巴丘地也下雋屬長沙郡故城在今蒲圻縣界吳初巴丘置大屯戍使魯肅守之後改為巴陵

縣自晉以後遂因之蜀志曰西增白帝之兵東益巴陵之戍又周瑜卒於巴丘皆此地也昔羿屠巴蛇於洞庭其骨若陵故曰巴陵

君山在縣西三十里青草湖中昔秦始皇欲入湖觀衡山遇風浪至此山止泊因號焉又云湘君所遊止故名之也

大江在縣北五里

巴陵城對三江口岷江為西江澧江為中江湖湘江為



南江

彭城洲在縣東北九十四里宋元嘉三年荊州刺史謝晦反臺遣到彦之進討軍次彭城洲彦之軍敗退保隱磯即此處也

侯景浦在縣東北十二里本名三湘浦景既克建業自統兵西趣荆峽先遣其將宋子仙任約襲郢州湘東王繹令王僧辯拒之景軍大敗燒營退走天監中寶誌道人為符書云起自汝蔡訖於三湘侯景東起於懸瓠汝

水之南而敗於巴陵三湘之浦也

洞庭湖在縣西南一里五十步周迴二百六十里湖口

有一洲為曹公洲

巴丘湖又名青草湖在縣南七十九里周迴二百六

十五里俗云古雲夢澤也曹公征荊州還於巴丘遇疾

燒船

案魏志郭嘉傳作遇疾疫燒船

歎曰郭奉孝在不使孤至此

澧湖一名翁湖在縣南十一里爾雅云河水決出還復

入者為澧左傳定公四年吳人敗楚於雍澨五戰入郢

即此是也

陶侃故城在縣東北八里

華容縣

中東至州一百六十里

本漢孱陵縣地吳分置安南縣隋平陳以縣屬岳州隋開皇十八年改為華容縣

方臺山在縣南三十二里出雲母往往有長四尺者可以為屏風掘時忌有聲响則所得麤惡

赤亭湖在縣南八十里侯景攻巴陵遣將任約等入湖

湘東王使胡僧祐陸法和夜以大艦遏湖口因風縱火鼓譟而前賊窮聚湖中俄然崩潰即此也

赤亭故城在縣西南七十里城據絕景原三面臨水極為阻隘梁湘東王遣胡僧祐據城以擒任約

湘陰縣 中下北至州三百三十里

本春秋時羅子國秦為羅縣今縣東北六十里故羅城是也宋元徽二年分益陽羅湘西三縣立湘陰縣

玉笥山在縣東北七十五里屈原放逐居此山下而作

九歌馬

湘水南自長沙縣界流入又北入青草湖昔王延壽有異才年二十而得惡夢作夢賦年二十一溺死於湘浦卽斯川也湘水至清雖深五六丈了了見底

汨水東北自洪州建昌縣界流入西經玉笥山又西經羅國故城為屈潭卽屈原懷沙自沈之所又西流入於湘水

舜二妃冢在縣北一百六十三里青草湖上

屈原冢在縣北七十一里

沅江縣

中下東北至州三百七十里

本漢益陽縣地梁元帝分置重華縣隋平陳改為安樂縣開皇末又改為沅江縣

關州在縣東南五十八里建安二十年孫權以先主得蜀使使求荊州先主言須得涼州乃相與權患之遣呂蒙襲長沙零陵桂陽三郡先主引兵五萬下公安令關羽入益陽此州蓋羽屯兵之處故以為名

沅江水西北自龍陽縣界流入與華容縣中分為界

昌江縣

中下西北至州六百五十里

後漢分長沙為漢昌縣孫權改為吳昌縣神龍三年析  
湘陰於故吳昌城改置昌江縣

汨水在縣東北四十里



元和郡縣志卷二十八



欽定四庫全書

史部

元和郡縣志卷二十九

詳校官編修<sub>臣</sub>曹城

檢討<sub>臣</sub>德生覆勘

總校官庶吉士<sub>臣</sub>倉聖脉

校對官中書<sub>臣</sub>石鴻翥

謄錄監生<sub>臣</sub>包文訓

欽定四庫全書

元和郡縣志卷二十九

唐李吉甫撰

江南道

洪州

豫章中都督府

開元戶五萬五千四百五  
元和戶九萬一千一百二十九

鄉九十四  
鄉一百一十

今為江南西道觀察使理所

管洪州饒州虔州吉  
州江州袁州信州撫

州管縣三十八

都管戶二十九萬三千一百

禹貢揚州之域春秋時楚之東境吳之西境七國時全為楚地秦滅楚為九江郡晉惠帝元康二年于郡理立江州東晉元帝時江州自豫章移理武昌郡自後或理湓城或理潯陽或理半洲並在湓城側近隋開皇九年平陳置洪州因洪崖井為名武德元年改為總管府七年改為都督府

州境

東西一千六百一十五里  
南北一千一百五十六里

八到

西北至上都三千八十五里  
西北至東都二千二百七十五里

東至饒州四百四十里

南至撫州二百一十九里

西至潭州一千一百三十五里  
北至江州三百二十五里

貢賦

開元貢  
元和貢

葛紵布  
丹參  
細葛布一十五疋

旋覆花

管縣七

南昌

高安

新吳

豐城

建昌

武寧

分寧

南昌縣

望郭下

漢高六年置隋平陳改為豫章縣寶應元年六月改為

鍾陵縣十二月改為南昌縣

高安縣

緊東至州一百五十里

本漢建城縣武德五年改為高安仍于縣置靖州八年廢州復為縣屬洪州

新吳縣

上東至州一百五十里

後漢靈帝中平中分海昏縣置隋開皇九年省入建昌武德五年又置舊隸楚今新屬吳故曰新吳

豐城縣

上北至州一百四十七里

本漢南昌縣地晉武帝太康元年移于今縣南四十里名豐城卽是雷孔章得寶劍處也

建昌縣

緊北至州一百二十二里

東三里故海昏城卽漢昌邑王賀所封今縣城則吳太史慈所築

武寧縣

上東至州三百六十里

長安四年割建昌界置

分寧縣

上東南至州六百五十里

貞元十六年刺史李巽奏分武寧縣西界置因以名焉

饒州 鄱陽上

開元戶一萬四千六十二

鄉二十

元和戶四萬六千一百一十六

鄉六十九

本秦鄱陽縣也屬九江郡鄱陽記云在揚州已午之間  
孫權分豫章立為鄱陽郡梁承聖二年改為吳州至陳  
光大元年省吳州依舊置郡隋開皇九年平陳改鄱陽  
為饒州其城即吳芮為番令所居城

州境

東西六百五十九里  
南北四百六十一里

八列

西北至上都三千一百三十里  
西北至東都二千三百二十里

東南至信州五百里

東北至池州五百八十里

東北至歙州七百里

西至洪州四百四十里

西至撫州四百七十里

貢賦

開元貢  
元和貢

麩金

紵布  
竹簟

杭米

管縣四

鄱陽 餘干 樂平 浮梁

鄱陽縣

上郭下



秦置孫權分豫章置鄱陽郡理于此晉武帝改為廣晉  
隋開皇九年改廣晉為鄱陽以在鄱水之北故曰鄱陽  
永平監置在郭下每歲鑄錢七千

餘干縣

上東至州一百里

漢餘汗縣淮南王云田于餘汗是也縣因餘汗之水為  
名隋開皇九年去水存干名曰餘干

樂平縣

上西至州一百四十里

本漢餘汗縣地後漢靈帝于此置樂平縣南臨樂安江

北接平林因曰樂平

銀山在縣東一百四十里每歲出銀十餘萬兩收稅山銀七千兩

浮梁縣

上西南至州二百二十里

武德五年析鄱陽東界置新平縣尋廢開元四年刺史韋玢再置改名新昌天寶元年改名浮梁每歲出茶七百萬駄稅十五餘萬貫

虔州

南康上

開元戶三萬二千八百三十七  
元和戶二萬六千二百六十

鄉五十七  
鄉五十七

孫權嘉禾五年分廬陵立南部都尉理雩都晉武帝太  
康三年罷都尉立為南康郡至永和五年移理贛隋開  
皇九年平陳罷南康郡為虔州大業三年罷虔州復為  
南康郡武德五年又再置虔州蓋取虔化水為名也

州境

東西一千四百二里  
南北一千三百三十九里

八到

西北至上都四千一百二十五里  
西北至東都三千三百一十五里

東至建州一千五百八十五里  
南至循州一千六百一十四里

西至郴州一千一十二里  
北至吉州四百七十四里

貢賦

開元貢  
元和貢

白紵布  
紵布

乾薑  
蜜梅

管縣七

贛

南康

信豐

大庾

雩都

虔化

安遠

贛縣

上郭下

貢水西南自南康縣來章水東南自雩都縣來二水至  
州北合而為一通謂之贛水因為縣名

南康縣

上東北至州八十里

本漢灌嬰所置南壄縣也屬豫章郡獻帝初平二年析南壄置南安縣晉太康五年改為南康

信豐縣

上北至州一百九十五里

獻帝初平二年分南壄立南安縣晉武帝改為南康永淳元年析南康更置南安天寶元年改為信豐

大庾縣

上東北至州二百二十里

南康記云前漢南越不賓遣監軍庾姓者討之築城于

此因之為名隋以為鎮神龍初改鎮為縣

雩都縣

上西北至州一百七十里

漢初所置因雩都水為名

虔化縣

上西南至州四百七十六里

本漢贛縣地吳寶鼎三年初置新都晉太康元年改為  
寧都隋開皇改寧都為虔化

安遠縣

上西北至州五百二十里

梁大同中于今縣南七十里安遠水南置安遠縣隋開

皇中廢貞元四年刺史路應重奏分雩都縣地置

吉州 廬陵上

開元戶三萬四千四百八十一  
元和戶四萬一千二十五  
鄉七十四  
鄉六十九

本秦廬陵屬九江郡獻帝興平二年分豫章于此置廬陵郡晉太康中移郡于石陽縣今舊州東北故城是也隋開皇中改廬陵為吉州有吉水因為名焉

州境 東西四百二十里  
南北六百九十二里

八到 西北至上都三千六百五十里  
北至東都二千七百九十里

東北至撫州四百五十里

南至虔州五百二十里

西至衡州九百一十里

北至洪州五百七十六里

貢賦

開元貢

白紵布

茶

陟釐

管縣五

廬陵 安福 永新 太和 新淦

廬陵縣

上郭下

本漢石陽縣晉移郡于此隋改為州又改名石陽縣為廬陵因廬水為名



安福縣

上東至州一百二十里

本漢安平縣後漢改為平都縣屬廬陵吳分置安城郡  
隋廢郡為安復縣武德中改為安福縣

永新縣

上東北至州二百二十一里

本漢廬陵縣地吳歸命侯所置屬安城郡隋開皇中廢  
顯慶四年又依舊置

太和縣

上北至州一百里

隋開皇九年平陳分廬陵縣置西昌縣十年改為太和

新淦縣

上南至州二百七十里

本漢舊縣豫章南部都尉所居縣有淦水因以為名陳  
割屬巴山郡隋開皇中廢郡縣屬吉州

江州

澤陽上

開元戶二萬一千八百六十五  
元和戶一萬七千九百四十五

鄉四十一  
鄉四十九

禹貢荆揚二州之境揚州云彭蠡既豬今州南五十二  
里彭蠡湖是也荊州云九江孔殷今州西北二十五里  
九江是也然彭蠡以東為揚州界九江以西屬荊州界

春秋時為吳之西境吳為越滅後復為楚地秦屬廬江  
郡漢屬淮南國晉太康十年以荆揚二州疆域曠遠難  
為統理分豫章鄱陽廬江等郡之地置江州因江水以  
為名理豫章至惠帝分廬江之潯陽武昌之柴桑置潯  
陽郡自東晉元帝至蕭齊或理半洲至陳武帝于潯陽  
置西江州復理豫章文帝天嘉元年省西江州江州自  
豫章復理潯陽隋文帝平陳置江州總管移理湓城大  
業三年罷江州為九江郡武德四年討平林士弘復置

江州五年又置總管七年改為都督貞觀二年罷都督  
府州理城古之湓口城也漢高帝六年灌嬰所築漢建  
安中孫權經此城權自標地令人掘之正得古井銘曰  
漢六年潁陰侯開三百年當塞後不滿百年當為應運  
者所開權以為已瑞井極深大江中風浪井水輒動晉  
咸和四年後將軍郭默殺平南將軍劉楨叛于此城陶  
侃討默築壘以攻之默乃以布囊盛米為壘以應陶今  
稱云陶公壘

州境

東西五百九十九里  
南北一百七十七里

八到

西北至上都二千七百六十里  
西北至東都一千九百五十里

東至宣州一千八百里

南至洪州三百二十五里

西至鄂州五百九十三里

西北至蘄州二百八十九里

貢賦

開元貢  
元和貢  
硃

生石斛

管縣三

潯陽

彭澤

都昌

潯陽縣

緊郭下

本漢舊縣屬廬江郡以在潯水之陽故曰潯陽隋平陳改潯陽為彭蠡縣大業二年改為湓城縣武德五年復改為潯陽縣

廬山在縣東三十二里本名鄣山昔匡俗字子孝隱淪潛景廬于此山漢武帝拜為大明公俗號廬君故山取號周環五百餘里

巢湖故城在縣東四十二里按楚有二巢在廬江六縣其南巢桀所奔處蓋在此

柴桑故城在縣西南二十里

半洲故城在縣西九十里按吳將孫慮黃武六年出鎮

于此築城

宮亭湖神廟在縣東南九十里

彭澤縣

上西南至州二百里

本漢舊縣屬豫章郡置彭城湖南因以為名隋開皇九年廢彭澤別置龍城縣至十八年又改為彭澤縣

馬當山在縣東北一百里橫入大江甚為險絕往來多

覆溺之懼

江水西自都昌縣界流入經縣北二十五里東北流入

秋浦縣界

都昌縣

上西北至州一百五十里

本漢彭澤縣地武德五年分置都昌縣以縣北有都村  
配以昌字取嘉名也

彭蠡湖在縣西六十里與潯陽縣分湖為界

釣磯山在縣南一百一十二里昔陶侃嘗釣于此得一



梭化為龍而去

彭澤故城在縣北四十五里晉陶潛為令理此城

左里故城在縣西南九十五里盧循為宋祖所敗自蔡  
州南走還屯潯陽聞大軍將至欲走豫章乃悉力柵斷  
左里及大軍至將戰高祖所執麾竿折幡沈水衆懼公  
笑曰往年覆舟之戰幡竿亦有折者今復然賊必破矣  
即進攻柵賊投水死者萬餘人遂大破

袁州

宜春上

開元戶二萬二千三百三十五 鄉四十一  
元和戶一萬七千一百二十六 鄉四十一

本秦九江郡地在漢為宜春縣屬豫章郡晉平吳後屬  
荊州東晉以來屬江州隋開皇十一年置袁州因袁山  
為名大業三年罷袁州為宜春郡武德五年討平蕭銑  
復置袁州

州境

東西五百二十六里  
南北二百二十五里

八到

西北至上都三千二百八十里  
西北至東都二千四百六十里

東至洪州七百四十里  
南至吉州三百一十七里

西至潭州五百二十六里  
北至江州五百二十五里

貢賦

開元貢

白紵布

麻布

管縣三

宜春

新喻

萍鄉

宜春縣

上郭下

本漢舊縣灌嬰定江南所築城晉武帝太康元年以太  
后諱春改為宜陽縣隋開皇十一年于縣置袁州移縣  
于城東五里復改為宜春

新喻縣

上西南至州一百五十里

本漢宜春縣地吳孫皓分置新渝縣因渝水為名今曰新喻因聲變也

萍鄉縣

上東至州一百四十二里

本漢宜春縣地吳寶鼎二年分立萍鄉先隸吉州隋開皇十一年屬袁州以地多生萍草因以為名

信州

上饒中

元和戶二萬八千七百一十一鄉六十四  
案此州置自乾元故不載開元戶鄉與貢賦

本漢餘汗縣地三國時又分鄱陽郡葛陽縣之地陳改  
為弋陽今州所理在弋陽縣東一百里乾元元年租庸  
使洪州刺史元載奏置

州境

案州境里  
數傳寫缺

八到

西北至上都三千六百里  
西北至東都二千八百二十里

東至衢州二百五十里  
東南至建州五百里

西北至饒州五百里

貢賦

元和貢  
繇藤紙

管縣五

上饒 玉山 弋陽 永豐 貴溪

上饒縣

上郭下

本吳所置隋平陳省乾元元年重立

玉山縣

上西至州九十里

證聖二年分常山須江等縣置乾元元年自衢州割入

信州

弋陽縣

上東至州一百里

後漢分餘汗東界立葛陽縣自吳至陳並屬鄱陽郡隋  
開皇中因失印改為弋陽縣乾元元年自饒州割屬信

州

永豐縣

中西北至州四十五里

本弋陽縣進賢鄉永豐里之地乾元元年置因里為名

貴溪縣

上東至州二百二十里

永泰元年洪州觀察使李勉奏割樂平餘干二縣置在

貴溪口因以為名

撫州臨川上

開元戶二萬四千九百八十八  
元和戶二萬四千七百六十七  
鄉四十八  
鄉五十一

本禹貢揚州之境秦屬九江郡漢屬豫章吳太平中改  
置臨川郡隋開皇九年改為撫州大業十二年又改為  
臨川縣武德五年又改為州

州境  
東西四百七十八里  
南北六百三十里

八到  
西北至上都三千三百五十里  
北至東都二千四百九十五里

東至饒州四百七十里  
南至虔州一千一百八十里



西南至吉州四百五十六里  
北至洪州二百一十九里

貢賦

開元貢 葛十疋  
元和貢 葛十疋

管縣四

臨川 南城 崇仁 南豐

臨川縣

上郭下

後漢和帝永元八年析南城縣為臨安縣開元九年改

為臨川縣

南城縣

上東南至州一百三十里

漢分豫章郡立為南城縣

崇仁縣

上東南至州一百里

本漢臨汝縣之地吳少帝太平二年分臨汝為新建縣屬臨川郡梁普通三年改為巴縣隋開皇中改為崇仁

南豐縣

上西北至州二百六十里

本漢南城縣地吳少帝分以為南豐縣隋平陳省入南城景雲二年又置先天二年又廢開元八年復置

宣州

宣城縣

開元戶八萬七千二百三十一  
元和戶五萬七千三百五十

鄉一百六十七  
鄉一百九十五

今為宣歙觀察使理所

管宣州歙州池州  
都管戶九萬一千

七百六

禹貢揚州之域春秋時屬楚秦為鄣郡漢武帝改為丹陽郡領縣十七理宛陵即今理是也漢有銅官輿地志云宛陵縣銅山者漢採銅所治也順帝立宣城郡東晉或理蕪湖或理姑熟或理赭圻隋開皇九年平陳改郡為宣州移于今理武德二年置總管府七年改為宣城

郡乾元元年復為宣州州理城周封楚子熊繹于此漢丹陽郡亦理此城俗傳晉桓彝所築

州境

東西四百八十六里  
南北五百五十二里

八到

西北至上都取和滁路三千一十里取潤州路三千七十里

西北至東都取和滁路二千一百五十里  
正南微西踰嶺至歙州三百八十里

西渡江至廬州六百四十里  
西南至池州三百四十里

正北微東至潤州四百里  
正北微西至和州二百五十里

貢賦

開元貢白紵布  
自貞元後常貢之外別進五色線毯及綾綺等珍

物與淮南兩浙相比

管縣十

宣城 南陵 涇 當塗 溧陽 溧水

寧國 廣德 太平 旌德

宣城縣

望郭下

本漢宛陵縣屬丹陽郡後漢順帝置至晉屬宣城郡隋  
自宛陵移于今理

敬亭山州北十二里即謝朓賦詩之所

青弋水州西九十九里

南陵縣

望東至州一百里

本漢春穀縣地梁于此置南陵縣仍于縣理置南陵郡  
隋平陳廢郡縣屬宣州

鵲頭鎮在縣西一百一十里即春秋時楚伐吳敗于鵲  
岸是也沿流八十里有鵲尾洲吳時屯兵處

梅根監在縣西一百三十五里梅根監并宛陵監每歲  
共鑄錢五萬貫

銅井山在縣西南八十五里出銅

利國山在縣西一百一十里出銅供梅根監

戰鳥山在縣西北一百二十里臨大江本名孤圻山昔桓溫于赭圻討賊屯兵山下夜中衆鳥鳴賊謂官軍已至一時驚潰因以為名

春穀故城在縣西一百五十里

赭圻故城在縣西北一百三十里西臨大江吳所置赭圻屯處也晉哀帝時桓溫領揚州收入朝參政自荊州

還至赭圻詔止之遂城赭圻鎮焉後城被火災乃移鎮姑熟

涇縣

繫東北至州一百五里

本漢舊縣因涇水以為名屬丹陽郡晉屬宣城郡武德七年于此置猷州八年廢以縣屬宣州

陵陽山在縣西南一百三十里陵陽子明得仙處

微嶺山在縣東南二百五十里涇水所出也

蓋山在縣西南二百八十里下有舒姑泉昔舒氏女化



為魚于此泉聞絃歌則有雙鯉湧出

當塗縣

繫東南至州一百九十三里

本漢丹陽縣地其當塗縣本屬九江郡漢為侯國左傳禹會諸侯于塗山注云在壽春東北以塗山為邑故名焉晉武帝太康初分丹陽置于湖縣成帝時以江北之當塗縣流人過江在于湖者僑立為當塗縣屬淮南郡隋大業十年廢于湖縣以當塗屬宣州

牛渚山在縣北三十五里山突出江中謂之牛渚圻津

渡處也始皇二十七年東巡會稽道由丹陽至錢唐即從此渡也晉左衛將軍謝尚鎮于此溫嶠至牛渚燃犀照諸靈怪亦在于是

博望山在縣西三十五里與和州對岸江西岸曰梁山在溧陽縣南七十里兩山相望如門俗謂之天門山山上皆有卻月城宋車騎將軍王玄謨所築于此屯兵捍禦

赤金山在縣北一十里出好銅與金類淮南子食貨志

所謂丹陽銅也

九井山在縣南十里殷仲文九日從桓溫登九井賦詩  
即此山也

龍山在縣東南十二里桓溫嘗與僚佐九月九日登此  
山宴集

丹陽湖在縣東南七十九里周迴三百餘里與溧水分  
湖為界

蕪湖水在縣西南八十里源出丹陽湖西北流入于大

江漢末湖側亦嘗置蕪湖縣吳將陸遜晉謝尚王敦皆嘗鎮此

姑熟水在縣南二里縣名因此

慈湖在縣北六十五里吳將卞融于此屯兵晉成帝咸和二年陶侃與蘇峻戰于慈湖侯景之亂兵至慈湖梁人聞之大恐

采石戍在縣西北三十五里西接烏江北連建業城在牛渚山上與和州橫江渡相對隋師伐陳賀若弼從此

渡隋平陳置鎮貞觀初改鎮為戍

溧陽縣

繫西南至州二百四十里

本漢舊縣屬丹陽郡以在溧水之陽為名吳時置屯田

于此隋屬蔣州

今潤州上元縣西石頭城是蔣州理也

又屬潤州大業二

年屬宣州

平陵山在縣南十八里晉成帝時李完圍韓晃于此山

斬之山高四十丈

溧水在縣南六里

溧水縣

上南至州二百二十五里

本漢溧陽縣地隋開皇十一年宇文述割溧陽之西丹陽之東置

中山在縣東南一十五里出兔為筆精妙

丹陽湖在縣西南二十八里與當塗縣分中流為界因城湖在縣南一百里周迴九十里多蒲魚之利

寧國縣

上西北至州一百一十里

本後漢末分宛陵南鄉置屬丹陽郡晉屬宣城郡其後

武德中廢天寶三年復置

五湖水在縣東北四里

廣德縣

縣西至州一百六十五里

後漢分故鄣縣置屬丹陽郡宋為經安縣隋仁壽三年屬湖州大業二年移于今理屬宣州至德二年改名廣德

桐汭水在縣西五十里春秋楚子期伐吳至桐汭是也

太平縣

上東北至州二百八十里

本涇縣地天寶四年宣城郡太守李和上奏割涇縣西南十四鄉置

黃山在縣西南四十里上有泉水泉側多黃連

旌德縣

上北至州二百三十里

本太平之地以縣界闊遠永泰初土賊王方據險作叛招討平之奏分太平置旌德縣

歙州

新安上

開元戶三萬一千九百六十一  
元和戶一萬六千七百五十四

鄉七十二  
鄉五十



禹貢揚州之域春秋時屬越秦時為丹陽郡歙縣之地  
其後或屬新都或隸新安郡或立新寧郡隋開皇十二  
年置歙州武德中置都督貞觀廢

州境

東西四百一十九里  
南北二百四十里

八到

西北至上都取睦州路四千八百五里取宣州路  
三千四百五十里

西北至東都三千二百二十五里取宣州潤州路  
二千五百九十里

東至杭州四百七十里

東至睦州三百七十里

西南至饒州七百里

正北微東至宣州三百里

貢賦

開元貢  
元和貢

麻布

細紵布

竹簞

管縣六

歙

黟

休寧

婺源

績溪

祁門

歙縣

上郭下

本秦舊縣也縣南有歙浦因以為名晉後屬新都郡或屬新安郡或屬新寧郡隋初省開皇十一年又置十二年置歙州及縣

北黟山在縣西北二百六十八里宣歙二州分界處

布射山一名勤山在縣北二十里吳志歙賊金奇萬戶屯于此

烏聊山在縣東南二百六步上有毛甘故城後漢末賊毛甘萬戶屯于此吳將賀齊討平之

浙江西自休寧縣界流入

黟縣 上東至州一百五十二里

本漢舊縣理在黟川因以為名屬丹陽郡隋平陳省入休寧縣十一年復置隸宣州十二年改隸歙州按縣南

有墨嶺出墨石又昔貢柿心木縣由此得名說文黟字  
從黑旁多後傳誤遂寫黟字

林厯山在縣西南一百五十里昔吳大帝使賀齊討黟  
歙山賊賊帥陳僕祖山等二萬戶屯此山四面壁立  
高數十丈徑路危狹不容方楯賊乘高下石不可得攻  
齊乃陰募輕健士密于隱險賊所不備處以戈帖山為  
緣道夜令勇士潛上懸布援人遂大破之忽賊中有善  
禁者官軍刀劍不得拔弓弩矢發多還自向賀齊令曰

吾聞蟲有毒者兵有刃者可禁其無刃者不可禁乃多  
作韌木白梃選異力精卒五千人攻之禁果不行賊遂  
大敗

休寧縣

上東至州六十六里

本秦歙縣地屬丹陽郡後漢建安中賀齊討黟歙山賊  
分休陽縣其後頻有改易隋開皇十八年改為休寧縣屬  
婺州十二年屬歙州

橫郭山在縣東南八十四里

浙江一名浙江源出縣東南橫鄣山東流經歙縣又東南入睦州界

婺源縣

上東北至州二百九里

本休寧縣西南界開元二十六年平妖賊洪氏始置此縣以婺源水遶城三面因以為名

善山在縣南五十里與惡山隔溪相對俗謂之夫婦山

績溪縣

中下西南至州六十六里

本梁大通元年于此置梁安縣武德中廢大厯二年刺

史長孫全緒奏分歙縣置此縣北有乳溪與徽溪相去一里並流離而復合有如績焉因以為名

祁門縣

中下東至州一百七十九里

本古昌門地漢黟縣之南境永泰元年草賊方清于此偽置昌門縣以為守備刺史長孫全緒討平之因其舊城置縣取其舊號以縣東北一里有祁山因改為祁門縣大歷五年又移于東面臨大溪西枕小山

池州

池陽下

元和戶一萬七千五百九十一鄉三十四  
案此州置自永泰故不載開元戶鄉與貢賦

本漢鄣郡之域吳于此置石城縣梁昭明太子以其水  
魚美故封其水為貴池今城西枕此水隋廢石城縣入  
南陵縣開皇中于此置秋浦縣永泰二年江西觀察使  
李勉奏置池州因武德四年總管左難當所奏舊名取  
貴池以為州號也

州境

案州境里數傳寫缺

八到

西北至上都取宣州路三千四百一十里取江州路二千五百三十里



西北至東都取宣州路二千五百一十里取江州路二千五百三十里

東南至歙州四百六十里  
東北陸路至宣州三百四十里

西至江州五百八十里  
西南至饒州五百八十里

正北微西渡江至舒州四百三十里

貢賦  
案元和貢賦傳寫缺

管縣四

秋浦 青陽 至德 石埭

秋浦縣  
上郭下

隋開皇十九年于石城故城置屬宣州永泰二年李勉奏置池州縣屬焉

烏石山在縣西一百四十里廣德初為賊陳莊方清所據袁倬破平之

大江水在縣北七里

貴池水在縣西七里

秋浦水在縣西八十里

青陽縣

上西南至州七十里

本漢涇縣地天寶元年洪州都督徐輝奏于吳所立臨城縣南置屬宣州在青山之陽為名永泰二年隸池州

至德縣

中東北至州二百五十里

本漢石城至德二年刺史宋若思奏置因年號為名初屬潯陽郡乾元元年改屬饒州永泰三年割屬池州

堯城在縣南四百里

舜城在縣北二十里舊傳兩帝南巡至此

石埭縣

中西北至州二百里

本漢丹陽郡地至吳大帝封韓當為石埭城侯因此置  
縣其後屢有廢興永泰二年洪府都督李勉奏割秋浦  
青陽涇三縣于吳所置陵陽城南五里置  
陵陽山在縣北三十里竇子明于此得仙

石埭在縣西北一百三十里有兩橫石壅江有如埭焉  
因名



元和郡縣志卷二十九